

上海南京路P二三八
中國晚報留聲部製售

國父演說話盤每片實
銀貳元四角郵費在內



總理留聲話盤粵語演說詞

中華民國三十三年五月三十日受音廣州

勉勵國民第一

中國晚報，請

(鄧彥華君言)

孫大元師講演：

(以下係中山先生演說)

諸君、我地大家係中國人。我地知道、中國幾千年來、係世界上頂富頂強之國家。知道唔知道呢。但係現在中國係乜野情形呢。中國現在、就變成係世界上頂貧頂弱嘅國家。中國嘅人民出海外嘅。就被外國人欺負、凌辱。看得唔像一個人樣。在中國內地呢。外國對於我的政府。對於我的國家。亦係睇唔起。所以外國就有演說將中國來瓜分之說。後來覺得呢個瓜分。係好難實行。恐怕因為瓜分中國。就惹出各國自己打自己。所以現在各國別從來商量。要把中國國庫來共管。大家來共管中國。就係睇中國唔起。以為中國係不能自己治理中國。諸君。你想想。我的中國幾千年來。係世界一個文明嘅國家、幾千年前、中國最強盛時代。所謂千邦進貢。萬國來朝。各國都要拜中國做上邦。到到今日。中國反為退化。呢個係為乜緣故呢。就係中國自從受滿洲征服以後。中國人失了國家精神。中國亡國於滿洲。二百六十幾年。中國人民。在於二百六十幾年之內。睡着覺。所以中國政治退化。文明退化。中國工商業退化。中國所以到到今日成為民窮財盡。變成各國睇唔起。

勉勵國民第二

中國墮落到今日呢個地位。我地做國民嘅。要有一種乜野感覺呢。我地對於國家。第一件。我地知道我地今日之危險。先知道危險。我地就要設法子來避呢個危險。咁用乜野法子來避得呢個危險呢。就係大家同心協力。來贊成革命。用革命嘅方法。用革命嘅主義。來救中國。革命主義係乜野呢。就係我的個三民主義。第一、民族主義。第二、民權主義。第三、民生主義。用呢三種嘅主義來救中國。係三種嘅主義呢。我地大家要留心。要來考究。咁從邊處能考究得呢三民主義。我近日在呢個廣東高師。每禮拜演說一次。頭一個、民族主義。演說了六個禮拜講完。第二個、民權主義。又演說了六個禮拜講完。第三個、民生主義。不日再來演講。現在呢個民權主義。民族主義兩種。已經係輯書出來。咁就要諸君留心呢個三民主義呢。就要將我呢個三民主義呢的演說。要留心詳細來讀過。呢個三民主義。係講得好透澈嘅。係發揮得好精密嘅。裏頭係好多新思想。好多新發明。諸君能讀呢個三民主義。就曉得用乜野方法來救國。我地能照住三民主義呢種方法。呢種精神。大家同心協力來救國。咁中國就可以反弱為強。轉貧為富。可以同今日之列強。並駕齊驅咯。

中山先生留聲紀念集

第一集每冊定價銀八角

上海南京路中二三八號

發行者

中國晚報館營業部

◎版權所有◎

◎不許翻印◎